

celles dont ie viens de parler, ce feroit vne grande confolation; mais le mal-heur est que quelques-vnes estant éloignées de nos habitations, se marient à la sollicitation de leurs parents, & tous leurs mariages n'estans pas felon Dieu, se rompent aussi ayfément qu'ils ont esté legerement contractez.

Nous en auons confirmé quelques vns dans leurs mariages depuis leur Baptesme; ceux-là, comme nous esperons, feront fermes & constans. L'entendois vne fois vne femme instruire son mary sur la Confession, i'estois consolé de voir la candeur de [57] ces bons Neophytes. Donne-toy bien de garde, disoit-elle, de cacher aucun de tes pechez, recherche les dans ta conscience, & les dy tous à Dieu, c'est à luy que tu parle, le Pere n'est là que pour tenir sa place, à cause que Dieu ne se fait pas voir en terre, mais sur tout fois bien marry de l'auoir offensé, car si tu n'as douleur de tes offenses, il ne se fera rien.

Voicy vn poinct qui m'a fort consolé. Les Hiroquois ayant paru proche des trois Riuieres, les Sauvages furent conuoquez de tous costez: estant r'assemblez, ils firent plusieurs festins de guerre, où il faut chanter, dancer, hurler, & tout cela par superstition pour auoir de l'auantage sur leurs ennemis, comme ils dancent les vns apres les autres, ils se donnent le signal, choisissant celuy qu'ils veulent faire dancer apres eux: Il arriua que l'vn de ces danceurs porta le bouquet ou le signal à François Xauier, vn de nos nouveaux Chrestiens; luy le reiette, renonçant à ces dances superstitieuses; on le presente à Ignace Amiskape, il en fit de mesme: on le presente à quelques autres Chrestiens, tous imiterent la hardiesse de ces braues Athletes, se mocquans des badineries de [58]